

金
聲
玉
振
集

十四

金

壽

堂

集

卷

十二

呂梁洪志

（金聲玉振集）

山川一

馮世雍曰輿地弗易詳攷也自古在昔分
土而治后世郡縣天下而三代之跡荒矣
分崩離折誰與彊理然山水之秀終古弗
易而呂梁之險猶夫古也志山川

呂梁洪爲徐州之域蓋徐之封域甚廣東至海
南至淮北至岱呂梁洪則在東南五十里洪有
二上下相距可七里蓋河之下流于濟會于徐
以達于淮者洪石森列如巨齒而水爲所束則



驚湍迅波一瞬數里舟逆流而上者則以尺寸計古稱懸水三十仞流沫四十里者信彭城之喉襟而勢轆淮宿者已文山氏曰呂梁貫當中潁濱氏曰呂梁齟齬橫絕乎其前信夫

洪中有諸溜乃激石而成者曰盧家溜曰門限石曰猫兒窩曰黃石溜曰侯家溜曰蝦蟆石曰邀繯石曰夜叉石曰飲牛石曰牛角硝曰轂輪石舟行經此必以群力挽之而後濟觀此可以知險矣

呂梁山在洪東連亘委蛇周數十里前有塔山

山上有寺廢矣有浮圖墮矣登而望則雲龍諸
峯蜿蜒在目下視洪流帶如也旁有鳳凰山山
有雙翅故名有泉曰虎頭西南曰勝雲山山有
石二孔水光瑩然雖霖不溢旱不枯東北曰峰
山下有七十二泉今或皆翳不食相傳張良厭
氣之所上有翻白草可入藥西北曰午山曰讀
書山不知何人讀書處

東南則有雙井村泉源出勝雲山東西二井相
向井有鮒旱浚之則雨上有龍王廟雍嘗登山
而暍求漿適有山人提壺至乃瀉而呷之味甚

甘曰斯泉之汲也民福之南則房村客舟輳集
居民富庶亦樂土也北則雍門村即古雍門周
善彈琴能使孟嘗君悲者東南則有縣水村按
莊列孔子觀於呂梁縣水三十仞流沫四十里
故名今村或疑呂梁之水今無此勢欲擬爲石
州之呂梁及考禹貢治岐及梁爾雅梁山晉望
呂不韋之龍門未辟呂梁未鑿酈道元之呂梁
崇竦河流激盪雖指石州之呂梁而言俱未有
縣水字今獨此洪有懸水村信哉宣父觀瀾之
地也又史記孔子將西見趙簡子至河而返則

石州呂梁亦聖轍未問津之地蘇軾贈呂梁仲
屯田詩曰官居獨住懸水村觀此亦可考矣

尉城唐尉遲恭疏治二洪築城居之呂城呂布
與曹瞞相拒而築雲夢城梁王城在洪西北此
韓彭之遺也雍嘗登二城之墟而望焉乃喟然
歎曰嗟乎地險山川丘陵也王公設險以守其
國方二子之輔季威羽沛彭相去數百里爾乃
據險築城以當要害卒之羽挫漢興此險不爲
無少助者歷今數千祀而故垣遺壘猶與洪流
爭雄二子其善用險者哉柰何鳥盡弓殲身族

不庇何明于用險而暗于習險也易曰習坎入
坎失道凶也重有感于二子之城

馮世雍曰呂梁山水雖不及今之一鄉而險阻
控持環引上下則隱然有虎豹重關之勢東連
齊魯北屬魏趙南通江淮西接梁楚乃敵國必
爭之地師行必據之險也王玄謨曰彭城南屈
大淮捍接邊境則呂梁以北制南之要地也尉
元曰彭城宋之要藩南郡來侵莫不因之以凌
諸夏則呂梁以南入北之要地也自漢以來未
經䟽鑿而其洶湧之流可以限敵高平之野可

以屯兵山林之藪可以伏甲故韓彭呂布之徒
皆竊據于此以固其勢而謝玄堰呂梁之水以
利師行之漕下至宋宣周武皆據有此險以取
萬全之勝然猶未可以方舟濟也迨唐之尉遲
蕞火攻石修濬以殺之而流稍緩矣然猶未可
以漕舟運也至宋之元祐乃修月河堤置上下
閘而漕始利矣我

國家定鼎北都東南貢賦悉由此道百五十年
王人拱極方貢流通漕舟客艘舳舻不絕誠要
路之形勝漕渠之會通也回視漢唐未克人和

徒藉地勢以自雄長者真下風矣夫在古則爲
必爭之阻在今則爲裕國之渠所謂伏至險于
大順藏不測于至靜之中者經國者可不加之
意哉

贊曰呂梁天成洪流禹通宣父興歎唐臣効
忠季世憑險稱干此雄嗟嗟要津鞠爲戰攻
漕渠載啓四方攸同纘禹之緒維皇之功

公署二

馮世雍曰公署古也古以險今以侈古以
爲民今以爲官陋矣夫公署者蒞政之度

也度弗嚴民何蒞焉志公署

呂梁洪分司公署在洪之東渚舊署甚濫弘治十一年主事來天球創建坐東向西屹立洪流而泰然當之外爲前門左右爲鍾鼓樓中爲牌坊扁曰運河通濟內進爲二門巍然中峙者爲正堂堂後左爲儀仗庫右爲小軒迤北爲後軒軒後爲狀元亭主事來天球爲大學士費公建亭後爲望雲樓主事伍全建迤北爲退軒公署之四周爲垣中爲石門左右通衢爲二門門有樓扁曰通裕曰澄清則爲雍所建而垣周六里

有樊園之勢焉則主事陳憲之力也

呂梁洪上閘在洪之北下閘在洪之南俱永樂十六年建巡檢司在洪南洪武六年建房村驛在洪南永樂十三年建稅課局裁革于正統年今仍建夫廠二區磚廠一區藥局一區今或類圯半存觀瀾亭一區則主事日臨饋運之所今在洪之東潞

呂梁書院主事郭持平建內有社倉二區先是洪民屢罹荒歉盜發其疆郭乃捐俸糴麥貯倉以時收歛令民每石出耗米三升小豐則取其

半無年則蠲之一倣朱子社倉法然行之未久
散或未周雍亦捐俸助之嗚呼自成周喪荒之
式廢而荒政久矣其弗講也先王有預備之政
命遺人掌委積以待凶荒后世移民粟設粥糜
下矣隋唐杜倉甚爲近古而世不能行何歟呂
東萊曰有志之士隨時理會故考朱子社倉記
及延和奏劄可謂有志倣古而便民者呂梁社
倉法雖未備而歛散之間民情便利散之以冬
春歛之以夏秋官無催命民無愆期使后之繼
者循之不失則十年之外可得千石之積脫有

凶荒洪民可以亡飢矣然豈獨呂梁能爲之哉
使今日邑中之社皆能行之一遵朱子之法又
何力之不能爲而凶歉之足患哉善乎朱子曰
王氏立法之意未爲不善但處之以縣而不以
鄉職之以官吏而不以鄉人士君子行之以聚
歛急疾之意而不以惻怛忠厚之心今之邑神
皆能體此意而爲之豈不爲今日復古一快事
歟至捐俸一節亦出至誠之意初非近名程子
曰一命之士苟存心于愛物于人必有所濟又
逞恤其他也若曰治洪濟漕之外他事不與焉

則非雍之所敢知也

新橋主事溫濡建裕泉亭主事蔣益建其餘若
居家橋黃家橋李家橋黃家井皆舊貫也至于
王公集費公集龍興集則亦先時部使者所開
今爲市云

洪上是堤厥功亦不細已成化八年主事張達
修之上洪石堤長三十五丈下洪石堤長三十
六丈成化十六年主事費瑄因洪北土壩易壤
改爲石壩長一百六十五丈復于壩西築堤一
十餘丈于洪東砌石路四百二十丈夫洪岸善

崩司水者病焉今二公之堤堅遠漕渠洪人

至今賴之君子曰二公可以祀茲土也夫

居家橋東有堤焉百川灌河洪流旁溢則此水
竟奔赴于下邳隄防少缺田禾盡沒主事郭持
平築堤障之水有所歸矣但堤薄而土易潰雍
重築而高厚之以爲民利考古井田之法有止
水有洩水有流水均之利于民也自穿引疏築
之取興而溝澮之法廢然皆不失古之遺意故
浚陂池通溝洫旱則引漑之溢則決注之今之
築堤意亦近此呂梁自丙戌之水民幾魚鼈雍

嘗乘舟循溝而進正見此堤之潰而佃人三時之勞一朝蕩然可哀也已乃鳩近堤佃人分工重築東西二堤長三百八十四丈闊一丈高八尺又采佃人之良者爲老人爲總甲以時補築之嗚呼庶幾以永斯堤也夫

淺鋪八黃鍾集淺石橋淺孟城灣淺侯家石淺房村淺龍塘淺雙溝淺

贊曰我我洪署旣儉而規重門長垣壯豫攸宜亦有高廩以散以歛宮謹其藏民安其便翼翼修堤以防潰河鴻濤旣抑豐年用多